



# **JABATAN PERKHIDMATAN VETERINAR**

## **LAPORAN PEMANTAUAN MEDIA**

**18 JUN 2024 (SELASA)**

## Harga telur gred A, B, C turun 3 sen

| MEDIA         | RUANGAN  | MUKA SURAT | TARIKH |
|---------------|----------|------------|--------|
| Berita Harian | Nasional | 2          | 18 Jun |

# Harga telur gred A, B, C turun 3 sen

Inisiatif selaras dengan janji, usaha kerajaan tangani kos sara hidup rakyat

Oleh Muhammad Yusri Muzamir  
yusri.muzamir@bh.com.my

**Kuala Lumpur:** Harga runcit telur ayam gred A, B dan C di seluruh negara diturunkan 3 sen sebijl berkuat kuasa semalam, menjadikan kadar baharu, masing-masing pada 42 sen, 40 sen dan 38 sen sebijl.

Penurunan harga runcit itu dibuat selepas kerajaan mengambil kira perkembangan semasa yang menunjukkan penurunan kos input pengeluaran telur ayam, terutama bahan asas makanan ternakan berkenaan.

Mengumumkan keputusan itu semalam, Perdana Menteri yang juga Menteri Kewangan, Datuk Seri Anwar Ibrahim, berkata langkah itu juga selaras usaha kerajaan mengembalikan hasil penjimatan penyasaran subsidi kepada rakyat.

"Penampungan subsidi keperluan makanan rakyat sebanyak 10 sen bagi sebijl telur ayam membolehkan perbelanjaan RM100 juta. Pada 2023, peruntukan subsidi telur ayam adalah RM927 juta.

"Harga runcit telur di Sabah, Sarawak dan Labuan juga akan diselaraskan mengikut bahagian dan zon yang diwartakan," katanya menegaskan masalah atau isu terkait kos kehidupan rakyat akan terus ditangani kerajaan secara lebih proaktif dan berkesan.

Memberi jaminan kerajaan juga berusaha sebaiknya dalam memampakan dampak buruk ke atas kehidupan harian rakyat, Perdana Menteri memberitahu, kerajaan masih mengekalkan harga minyak masak sawit tulen kemasan botol.

Harga itu, masing-masing RM6.90 satu kilogram (kg), RM13.30 (2kg), RM19.60 (3kg) dan RM30.90 (5kg) yang dikekalkan sejak Kerajaan Perpaduan mengambil alih pentadbiran negara biarpun harga minyak sawit mentah (CPO) dunia meningkat melebihi harga ambang RM3,890 satu tan.

"Sebagai contoh, harga CPO pada Mac dan April lalu, masing-masing RM4,215 satu tan dan April RM4,256 satu tan. Harga minyak masak sawit tulen 5kg boleh meningkat antara RM33 hingga RM35," jelas Anwar.

Berkait diesel, Perdana Menteri



Penurunan harga runcit bagi telur gred A, B dan C dibuat selepas kerajaan mengambil kira perkembangan semasa yang menunjukkan penurunan kos input pengeluaran telur ayam. (Foto hiasan)

menegaskan, kerajaan komited menangani penyeludupan bahan api itu sambil berusaha mengimbangnya dengan perihal bekalan dan kos sara hidup rakyat.

### Tak hapus subsidi diesel

Beliau juga mengulangi kerajaan tidak menghapuskan subsidi, sebaliknya tindakan dilakukan ketika ini bertujuan memastikan pengurusan subsidi lebih cekap, tidak tiris dan sampai kepada kumpulan rakyat selayaknya.

"Kerajaan masih perlu menanggung kira-kira RM7 billion subsidi berkaitan diesel di Semenanjung.

"Tujuan utama dasar penyasaran subsidi diesel demi memastikan pembaziran subsidi tidak lagi diteruskan sambil memastikan penjimatan mesti dipulangkan kepada rakyat terbanyak.

"Hasil penjimatan daripada penyasaran subsidi ini tentu akan dikembalikan kepada rakyat dalam bentuk pendidikan, kesihatan, pengangkutan awam dan lain-lain sektor yang memberi dampak terbesar kepada rakyat," katanya.

Anwar mendedahkan, sebanyak 6,441,118 liter diesel dianggarkan bernilai RM14,208,824 dirampas setakat 31 Disember lalu menerusi Ops Tiris yang dige-

rakkan kerajaan melalui Kementerian Perdagangan Dalam Negeri dan Kos Sara Hidup (KPDN) sejak 1-Mac 2023.

Ops Tiris yang bertujuan membanteras penyelewengan diesel bersubsidi ketika ia memanfaatkan golongan tidak layak berjaya menghasilkan perkembangan positif dan kerana itu, kata Perdana Menteri, kerajaan meneruskan Ops Tiris 3.0.

Ops Tiris 3.0 dijalankan dengan skop diperluas merangkumi barang kawalan lain, iaitu gula putih bertapis (kasar dan halus), minyak masak bungkus polibeg 1kg, petrol RON95 dan gas petroleum cecair (LPG).

"Sehingga Jumaat lalu, barang kawalan bernilai RM12,956,089.96 dirampas dengan diesel menjadi barangan kawalan tertinggi diseludup dan diseleweng," katanya.

Penyasaran subsidi diesel menyasarkan harga bahan api itu ditetapkan RM3.35 sen seliter di semua stesen minyak runcit seluruh Semenanjung bermula jam 12 tengah malam 10 Jun lalu.

Serentak itu, 30,000 kumpulan awal pemilik kenderaan diesel persendirian menerima bantuan bulanan RM200 menerusi program BUDI MADANI mulai hari sama.




## Telur ayam A, B dan C turun harga

| MEDIA | RUANGAN | MUKA SURAT | TARIKH |
|-------|---------|------------|--------|
| Kosmo | Negara! | 4          | 18 Jun |



HARGA telur bagi Gred A, B dan C turun sebanyak 3 sen mulai hari ini selepas kerajaan memperkenalkan penyasaran subsidi diesel baru-baru ini. - GAMBAR HIASAN



PENYASARAN subsidi dilaksanakan untuk mengekang penyeludupan diesel oleh pihak tertentu. - GAMBAR HIASAN

Hasil penyasaran subsidi diesel diserap ke barangan lain

## Telur ayam A, B dan C turun harga

Oleh RIDZAUDDIN ROSLAN

**PUTRAJAYA** – Kerajaan mengumumkan harga runcit bagi telur gred A, B dan C diturunkan 3 sen\* sebijl berkuat kuasa semalam sebagai usaha mengembalikan hasil penjimatan penyasaran subsidi kepada rakyat.

Perdana Menteri, Datuk Seri Anwar Ibrahim berkata, penurunan itu menyaksikan harga runcit baharu bagi telur ayam tersebut menjadi 42 sen, 40 sen dan 38 sen sebijl.

Katanya, penampungan subsidi keperluan makanan rakyat sebanyak 10 sen untuk sebijl telur ayam itu melibatkan perbelanjaan RM100 juta.

"Pada 2023, peruntukan subsidi telur ayam ialah sebanyak RM927 juta. Harga runcit telur ayam di Sabah, Sarawak dan Labuan juga akan diselarasakan

mengikut bahagian dan zon yang diwartakan," katanya dalam satu kenyataan.

Dalam pada itu, Anwar berkata, kerajaan tidak menghapuskan subsidi, sebaliknya apa yang dilakukan ketika ini ialah bagi memastikan pengurusan dilaksanakan secara lebih cekap.

Tambahnya, kerajaan masih menanggung subsidi berkaitan diesel di Semenanjung Malaysia dengan peruntukan kewangan sekitar RM7 bilion di Semenanjung.

"Subsidi diesel tidak dihapuskan, tetapi apa yang dilakukan adalah memastikan pengurusan yang lebih cekap, tidak tiris dan sampai kepada kumpulan rakyat yang selayaknya," katanya.

Menurut Anwar, tujuan penyasaran subsidi diesel ialah bagi memastikan pembaziran pembelian tidak berterusan di samping



ANWAR

memastikan penjimatan terbayar mesti dipulangkan kepada rakyat.

"Hasil penjimatan daripada penyasaran subsidi ini tentunya akan dikembalikan kepada rakyat dalam bentuk pendidikan,

kesihatan, pengangkutan awam dan lain-lain sektor yang memberi dampak terbesar.

"Selain itu, kerajaan masih mengekalkan harga minyak masak tulen kemasan botol pada harga RM6.90 (1kg), RM13.30 (2kg), RM19.60 (3kg) dan RM30.90 (5kg) sejak mengambil alih tampuk kepimpinan," jelasnya.

Katanya, pengkalan harga itu dibuat meskipun harga minyak sawit mentah (CPO) dunia meningkat melebihi harga ambang RM3,890/mt.

"Sebagai contoh dengan harga CPO pada bulan Mac RM4,215/mt dan April RM4,256/mt, harga minyak masak sawit tulen 5kg boleh meningkat sehingga RM33-RM35," jelasnya.

Dalam perkembangan sama, Anwar berkata, lebih 6.4 juta liter minyak diesel bernilai RM14.2 juta telah dirampas setakat 31

Disember 2023 dalam Op Tiris oleh Kementerian Perdagangan Dalam Negeri dan Kos Sara Hidup sejak 1 Mac 2023.

"Ia bagi membanteras masalah penyelewengan diesel bersubsidi tatkala ia memanfaatkan pihak yang tidak layak.

"Op Tiris 3.0 akan dilaksanakan mencakupi barang kawalan lain iaitu gula putih bertapis, minyak masak 1 kg, RON95 dan gas petroleum cecair," katanya.

Ujar Anwar, sehingga Jumaat lalu, lebih RM12 juta nilai barang kawalan telah dirampas dengan diesel menjadi barangan kawalan yang tertinggi yang diseludup dan diseleweng.

Lantaran itu, Kerajaan Madani akan kekal komited menangani penyeludupan diesel sambil berusaha mengimbangi dengan perihal bekalan dan kos sara hidup rakyat.

## Daging korban boleh bertahan sampai setahun dalam peti sejuk

| MEDIA | RUANGAN | MUKA SURAT | TARIKH |
|-------|---------|------------|--------|
| Kosmo | Negara! | 16         | 18 Jun |

### Daging korban boleh bertahan sampai setahun dalam peti sejuk

**PETALING JAYA** – Musim perayaan Aidiladha ini, tentu sekali stok daging korban akan memenuhi ruang peti sejuk di rumah.

Bagi memastikan kualiti daging korban dapat bertahan lama sehingga 12 bulan, terdapat beberapa tip penyimpanan dengan betul.

Menerusi perkongsian Public Health Malaysia (PHM) di Facebook, tip pertama adalah daging tidak perlu dibasuh sekiranya ingin disimpan dalam peti sejuk.

Ini kerana, mencuci daging mentah sebelum menyimpannya

meningkatkan risiko kontaminasi silang dengan memercikkan bakteria ke permukaan dan peralatan dapur lain.

"Selain itu, buang bendasing yang terdapat pada daging seperti daun pisang, pasir dan serpihan kayu.

"Potong daging kepada bahagian yang lebih kecil dan simpan dalam bekas-bekas kecil bagi memudahkan untuk bawa keluar untuk dimasak nanti," jelas PHM.

Tip seterusnya adalah labelkan tarikh mula disimpan pada bekas yang digunakan bagi memudahkan

kan untuk menyemak tempoh penyimpanan daging tersebut.

"Bungkus daging dengan ketat menggunakan plastik pembungkusan. Pastikan tiada udara yang terperangkap dalam bungkusan dan jangan masukkan plastik kotor terus ke dalam ruang beku.

"Simpan daging di bahagian paling sejuk dalam peti sejuk pada suhu di bawah empat darjah Celsius jika ia akan digunakan dalam masa beberapa hari.

"Untuk penyimpanan lebih lama, bekukan daging dalam peti sejuk beku pada suhu -18 darjah

Celsius atau lebih rendah," jelas PHM.

Dalam pada itu, PHM turut berkongsi cara lembutkan daging beku.

"Letakkan daging beku di bahagian paling bawah peti sejuk untuk elak air menitis dan mencemarkan barang lain. Lakukan dalam tempoh 24 jam sebelum masak. Boleh gunakan ketuhar gelombang mikro juga.

"Jangan membekukan semula daging yang telah dicairkan, kerana ini boleh meningkatkan risiko kontaminasi bakteria dan menje-

jakan kualiti daging," kata PHM.

Jelas portal kesihatan itu, daging merah seperti daging lembu, kambing atau rusa yang disimpan di dalam ruang beku pada suhu -18 darjah Celsius atau lebih rendah boleh bertahan untuk jangka masa yang lama.

"Daging mentah (steak, potongan besar) bertahan enam hingga 12 bulan. Daging mentah (potongan kecil, kepingan) bertahan empat hingga enam bulan. Daging yang dimasak boleh disimpan selama dua hingga tiga bulan," ujarnya.



## Tiada kenaikan harga ayam di Sabah

| MEDIA           | RUANGAN      | MUKA SURAT | TARIKH |
|-----------------|--------------|------------|--------|
| Utusan Malaysia | Dalam Negari | 35         | 18 Jun |

# Tiada kenaikan harga ayam di Sabah

**KOTA KINABALU:** Pelaksanaan penyasaran subsidi diesel di Semenanjung tidak memberi kesan kepada kenaikan harga ayam di Sabah pada masa ini.

Tinjauan *Utusan Malaysia* di Pasar Awam dan Tamu Donggongon, Penampang mendapati harga ayam termasuk ayam jagung kekal sama dengan harga sebelum berkuat kuasa penyasaran subsidi diesel di Semenanjung.

Peniaga, Melda Abdul, 56, berkata, memandangkan subsidi bersasar diesel belum dilaksanakan di Sabah, maka tidak berlaku kenaikan harga barangan mentah di negeri ini.

Setakat ini, jelasnya, harga ayam jagung yang diperoleh daripada pembekal masih sama.

Justeru, katanya, harga jualan ayam jagung juga kekal RM17 sekilogram untuk ayam bulat.

Namun, tambahnya, bahagian paha dan dada dijual pada harga RM19 sekilogram, berbeza dengan ayam putih, bahagian paha dan dada ayam dijual pada harga RM17 sekilogram manakala, sayap ayam RM20 sekilogram.

"Biarpun tiada kenaikan harga, peniaga berhadapan dengan kesukaran untuk menghabiskan jualan ayam setiap hari.

"Sebelum sambutan Hari Raya Aidiladha pun tempahan



**MELDA Abdul** menyusun daging ayam yang dijualnya di tapak Tamu Donggongon, Penampang, Sabah.

ayam masih perlahan. Sebelum pandemik Covid-19, jualan ayam menjelang musim perayaan boleh melebihi 100 ekor tapi sekarang, mahu jual 20 ekor ayam pun sukar," katanya.

Seorang lagi peniaga, Florence Hendry, 18, berkata, kebanyakan peniaga di Pekan Donggongon menjual ayam jagung kerana permintaannya yang tinggi.

"Jika pelanggan hendak men-

cari ayam biasa, ia ada dijual di pasar raya tapi ayam jagung hanya boleh didapati di pasar awam atau tamu.

"Setiap hari kami jual antara 20 hingga 30 ekor ayam, itupun ada kalanya tidak habis terjual," katanya.

Bagaimanapun, jelasnya, semasa perayaan Pesta Kaamatan atau Krismas, mereka boleh menjual sehingga 100 ekor ayam jagung dalam masa sehari,

## JPV P.Pinang keluarkan 1,732 permit sembelihan luar bagi ibadah korban

| MEDIA           | RUANGAN | MUKA SURAT | TARIKH |
|-----------------|---------|------------|--------|
| Malaysi Gazette | Online  |            | 15 Jun |

### JPV P.Pinang keluarkan 1,732 permit sembelihan luar bagi ibadah korban

Malinda Abdul Malik • 15 June 2024



Gambar hiasan. Foto - MOHD ADZLAN 29 JUN 2023.

GEORGE TOWN – Sebanyak 1,732 permit sembelihan luar membabitkan 5,756 ekor ternakan bagi ibadah korban dikeluarkan Jabatan Perkhidmatan Veterinar (JPV) Pulau Pinang tahun ini.

Pengarahnya, Dr. Saira Banu Mohamed Rejab berkata, jumlah permit pada tahun ini meningkat berbanding 714 permit sembelihan luar membabitkan 3,002 ekor ternakan yang dikeluarkan tahun lalu.

Jelasnya, peningkatan itu disebabkan kesedaran pemain industri dan kempen yang dijalankan JPV negeri berhubung keperluan permohonan permit.

"Kebiasaannya semua penyembelihan dilaksanakan di dalam rumah penyembelihan diluluskan dan rumah penyembelihan dilesenkan di bawah Akta Rumah Penyembelihan (Penswastaan) 1993.



Saira Banu.

"Bagaimanapun, disebabkan permintaan dan peningkatan jumlah penyembelihan pada Hari Raya Aidiladha, dengan merujuk kepada Kaedah-Kaedah Binatang (Kawalan Penyembelihan) 2009, penyembelihan bagi tujuan korban dibenarkan di luar rumah penyembelihan diluluskan atau rumah penyembelihan dilesenkan.

"Penyembelihan luar ini hanya dibenarkan selama empat hari iaitu pada Hari Raya Aidiladha dan Hari Tasyrik bermula pada 17 sehingga 20 Jun selain, tempat yang dipilih perlulah bersesuaian, tidak menyebabkan pencemaran serta mengganggu orang awam," katanya dalam kenyataan media.

Tambah beliau, bekalan ternakan ibadah korban di negeri juga mencukupi dengan kira-kira 6,000 ekor ternakan ruminan tersedia dan 80 peratus daripadanya adalah ternakan lembu.

"Seramai 39 pihak berkuasa veterinar dan 15 pegawai penguat kuasa akan menjalankan pemantauan dan pemeriksaan ternakan di lokasi sembelihan bagi memastikan ternakan bebas dari sebarang penyakit," katanya. – MalaysiaGazette



## Permohonan permit sembelihan luar boleh dibuat hingga 20 Jun - Veterinar

| MEDIA   | RUANGAN | MUKA SURAT | TARIKH |
|---------|---------|------------|--------|
| Bernama | Online  |            | 15 Jun |

### PERMOHOHAN PERMIT SEMBELIHAN LUAR BOLEH DIBUAT HINGGA 20 JUN - VETERINAR



KUALA LUMPUR, 15 Jun (Bernama) -- Permohonan bagi mendapatkan Permit Sembelihan Luar (PSL) bagi ibadah korban masih boleh dibuat sehingga 20 Jun, menurut Jabatan Perkhidmatan Veterinar (DVS).

Menerusi kenyataan kepada Bernama, DVS memaklumkan pemohon perlu merujuk Pejabat Perkhidmatan Veterinar Daerah semasa mendapatkan Sijil Kesihatan Veterinar (SKV) ternakan bagi lokasi pengeluaran permit sama ada perlu dimohon di Pejabat Perkhidmatan Veterinar Daerah atau Rumah Sembelih DVS yang terdekat.

“Penyembelihan yang dijalankan di luar rumah sembelih seperti masjid, sekolah, taman perumahan dan lain-lain lokasi, perlu mendapatkan kebenaran melalui permohonan permit penyembelihan luar yang boleh dipohon di Jabatan Perkhidmatan Veterinar negeri atau daerah,” menurut kenyataan itu.

DVS memaklumkan bagi yang ingin membuka rumah sembelih pula boleh membuat permohonan dengan mengisi borang permohonan yang boleh didapati di laman sesawang DVS di <https://www.dvs.gov.my/>.

Menurut kenyataan itu, terdapat 27 rumah sembelihan jabatan itu di seluruh Semenanjung Malaysia sedia beroperasi bagi tujuan ibadah korban, ketika perayaan yang akan disambut Isnin ini.

DVS turut menganggarkan lima peratus penyembelihan luar masjid atau surau, akan melibatkan permintaan 1,776 ekor lembu atau kerbau dan 1,051 ekor kambing/bebiri.

Sementara itu bekalan ternakan korban untuk Hari Raya Aidiladha di seluruh negara tahun ini dijangka mencukupi, berdasarkan kepada bekalan haiwan yang telah diimport dan ternakan tempatan sedia ada di seluruh negara pada masa ini.

DVS memaklumkan stok bekalan lembu atau kerbau tempatan bagi penyembelihan hari raya korban adalah sebanyak 47,077, manakala jumlah haiwan berkenaan yang diimport sehingga Mac lepas sebanyak 2,328.

“Bagi kambing atau bebiri, bekalan tempatan untuk penyembelihan hari raya korban adalah sebanyak 33,858 ekor manakala yang diimport sehingga Mac lepas, sebanyak 1,944 ekor,” menurut kenyataan itu.

DVS turut menerbitkan Garis Panduan Penyembelihan Ternakan Korban untuk dijadikan panduan dengan mengambil kira aspek kebajikan haiwan, keselamatan makanan serta undang-undang dan peraturan, berhubung pemantauan ternakan korban, premis dan operasi penyembelihan serta pengurusan sisa ternakan untuk mengelakkan risiko jangkitan penyakit zoonotik.

-- BERNAMA

**TERIMA KASIH**

**DISEDIAKAN OLEH:**

**UNIT KOMUNIKASI KORPORAT  
JABATAN PERKHIDMATAN VETERINAR**